

DEWAN RA'AYAT YANG PERTAMA

PERSEKUTUAN TANAH MELAYU

PENGGAL YANG KEDUA

KERTAS PEMBERITAHU

HARI KHAMIS, 21 APRIL, 1960

PERTANYAAN² BAGI JAWAB MULUT

***1. Datin Fatimah binti Haji Hashim:** Minta kepada Menteri Pembangunan Luar Bandar menerangkan ada-kah Kerajaan berchadang mengadakan sa-buah pusat latehan perusahaan tangan dan pertanian bagi orang² perempuan di-kawasan Negeri Kedah sa-bagaimana yang telah diadakan dalam Seberang Perai, Bukit Mertajam.

***2. Enche' V. David:** Minta kepada Menteri Pembangunan Luar Bandar menerangkan jika beliau akan mengeluarkan penyata Jawatan-Kuasa Penyelidek Khas yang di-lantek menyelideki kemalangan ayer bah di-Lombong Emas Australia Raub yang di-bawah tanah itu pada tahun sudah di-mana banyak nyawa² yang telah terkorban.

***3. Enche' V. David:** Minta kepada Menteri Perdagangan dan Perusahaan menerangkan akan sebab-nya maka pendapat² Jawatan-Kuasa Penyelidek Perusahaan Nanas pada bulan August, 1959, telah tidak dikeluarkan dan boleh-kah beliau menerangkan bila beliau akan mengeluarkan pendapat² ini.

***4. Enche' V. David:** Minta kepada Menteri Luar menerangkan (a) dengan negeri mana Persekutuan telah menanda tangan perjanjian kerana menyerahkan kembali orang² asing kepada pihak yang bertanggung-jawab (b) dengan negeri mana Persekutuan berchadang hendak di-adakan perjanjian sa-rupa itu.

***5. Enche' V. Veerappen:** Minta kepada Menteri Pelajaran menerangkan:

- (a) ada-kah semua jemaah Pengurus/Gabnor² sekolah² yang menerima bantuan penoh sa-rupa susunan-nya, ia-itu sa-rupa di-dalam sharat² pentadbir dan kuasa²-nya, jika tidak terangkan apa-kah mustahak-nya di-adakan perubahan² itu;
- (b) ada-kah sama chara² kenaikan pangkat dan pelantekan pengetua² sekolah² yang di-beri bantuan penoh.

***6. Enche' Ng An Teck:** Minta kepada Menteri Pertahanan menerangkan berapa-kah banyak-nya orang² tahanan yang sedang berada di-dalam tahanan atau baharu sahaja di-tahan jadi gila, berikan butir² di-mana-kah mereka berada sekarang.

***7. Enche' Ng An Teck:** Minta kepada Menteri Pertahanan menerangkan apa-kah sebab² yang di-berikan oleh Pegawai Perubatan maka terjadi-nya keadaan otak demikian dan ada-kah pandangan ini di-terima oleh Doktor² Penyakit Jiwa dan Pengawas Rumah Sakit Otak dan jika tidak apa-kah sebab-nya yang di-beri oleh mereka.

***8. Enche' Ng An Teck:** Minta kepada Menteri Pertahanan menerangkan ada-kah Kerajaan akan mengambil tindakan untuk memeriksa kesihatan orang² tahanan sa-belom mereka di-hadapkan untuk di-siasat.

***9. Enche' K. Karam Singh:** Minta kepada Menteri Kenderaan menerangkan jika beliau sedar ia-itu pada pintu masuk ka-tandas buang ayer kechil di-Perhentian Keretapi, Seremban ada sa-keping papan pemberitahu demikian bunyi-nya, "Penumpang² Kelas satu dan dua sahaja" dan, jika beliau sedar, ada-kah beliau akan membetulkan keadaan ini agar semua penumpang² ta' kira kelas mana mereka menumpang, dapat menggunakan tandas itu.

PERTANYAAN² BUKAN BAGI JAWAB MULUT

1. Enche' V. David: Minta kepada Perdana Menteri menerangkan berapa orang-kah Pegawai² Berdagang di-Radio Malaya, bilangan juruhebah sambilan daripada pegawai dagang dan jumlah gaji² mereka, bilangan anak negeri yang di-beri kerja² yang sama dan jumlah gaji² mereka, dan bila-kah Perdana Menteri hendak memberikan semua kerja² sambilan yang di-pegang oleh pegawai berdagang itu kepada pegawai² anak Tanah Melayu.

2. Enche' V. David: Minta kepada Perdana Menteri akan bilangan Setia-Usaha² dan Penulis² Trengkas yang bukan ra'ayat Persekutuan yang di-ambil bekerja oleh Menteri² dan apa-kah dasar² Kerajaan terhadap memberi kerja² kepada orang² yang bukan ra'ayat Persekutuan di-dalam hal kerja² sa-rupa itu di-dalam perkhidmatan Kerajaan.

3. Enche' V. David: Minta kepada Perdana Menteri menerangkan pernah-kah beliau meminta daripada bekas Duta German, Dr. Granow, agar di-berikan jurutera², dan jika beliau pernah berbuat demikian, apa-kah hasil permintaan itu.

4. Enche' V. David: Minta kepada Perdana Menteri menerangkan bila-kah daftar² bulanan harga barang² runchit di-agak dapat di-keluarkan dan, jika beliau akan mempercepatkan pengeluaran-nya.

5. Enche' V. David: Minta kepada Perdana Menteri menerangkan jika beliau sedar rasa tidak puas hati yang amat sangat mempengaruhi fikiran pekerja² gaji hari Kerajaan di-sebabkan oleh lewat-nya di-ishtihar-kan keputusan² penyelidikan yang di-jalankan oleh Surohanjaya Penyelidik, Pekerja² Gaji Hari Kerajaan, yang di-lantek pada awal tahun 1959, dan jika beliau akan mengambil tindakan kilat untuk mempercepatkan pengeluaran Penyata itu.

6. Enche' V. Veerappen: Minta kepada Menteri Pelajaran menerangkan:

- (a) bilangan sekolah Kerajaan yang mendapat bantuan penoh;
- (b) bilangan sekolah pengembang ugama yang mendapat bantuan penoh;
- (c) bilangan sekolah orang ramai yang mendapat bantuan penoh;
- (d) bilangan sekolah pengembang ugama Keristian yang pengetua²-nya ia-lah (i) orang Keristian; (ii) bukan orang Keristian.